



Broj: A-432/19

Bihać, 20.05.2019. godine

Na osnovu člana 21. i člana 30. stav 1. Zakona o Kantonalnom tužilaštvu Unsko-sanskog kantona („Službeni glasnik Unsko-sanskog kantona”, broj 11/03 i 10/15) i Pravilnika o unutrašnjoj organizaciji Kantonalnog tužilaštva Unsko-sanskog kantona broj: 54/18 od 14.06.2018. godine, u skladu sa Smjernicama za objavljivanje tužilačkih i sudskih odluka na službenim web stranicama, glavna kantonalna tužiteljica Kantonalnog tužilaštva Unsko-sanskog kantona, uz odobrenje Kolegija tužilaca Kantonalnog tužilaštva Unsko-sanskog kantona od 20.05.2019. godine, donosi sljedeće:

OBAVEZNO UPUTSTVO o proceduri redovnog informisanja javnosti

I OPĆE ODREDBE

Član 1.

(Predmet Uputstva)

(1) Obaveznim uputstvom o proceduri redovnog informisanja javnosti (u daljem tekstu: Uputstvo) utvrđuje se procedura informisanja medija i druge zainteresirane javnosti o tužilačkim odlukama, sudskim odlukama u predmetima Kantonalnog tužilaštva Unsko-sanskog kantona, učešću tužilaca i drugog tužilačkog osoblja na seminarima i konferencijama, aktivnostima, posjetama i sastancima, tužilaca i drugog tužilačkog osoblja, te drugim aktivnostima u radu Kantonalnog tužilaštva Unsko-sanskog kantona koje su od posebnog interesa za javnost.

(2) Uputstvo ne obrađuje proceduru informisanja javnosti o predmetima koji se tiču maloljetnih počinilaca krivičnih djela, maloljetnih oštećenih i žrtava seksualnih delikata, jer su lični podaci ovih kategorija zaštićeni odredbama posebnih zakona.

(3) Uputstvo ne obrađuje proceduru informisanja javnosti o informacijama koje u registru vodi Kantonalno tužilaštvo Unsko-sanskog kantona u skladu sa Zakonom o slobodi pristupa informacijama.

(4) Uputstvo ne obrađuje proceduru informisanja javnosti o informacijama o početnim fazama otkrivanja krivičnog djela i počinilaca koje se dostavljaju javnosti od strane agencija za provedbu zakona.

Član 2.
(Cilj Uputstva)

(1) Uputstvo se donosi s ciljem jedinstvenog postupanja svih tužilaca Kantonalnog tužilaštva Unsko-sanskog kantona i stručnog saradnika za pristup informacijama i odnose s javnošću-portparola u davanju informacija medijima i drugoj zainteresiranoj javnosti.

(2) Informacije će se medijima davati pod jednakim uvjetima.

Član 3.
(Način informisanja javnosti)

(1) Informacije će medijima u pravilu davati stručni saradnik za pristup informacijama i odnose s javnošću-portparol nakon prethodne konsultacije s glavnim kantonalnim tužiocem i postupajućim tužiocem.

(2) Informacije će se medijima davati putem službene e-mail adrese stručnog saradnika za pristup informacijama i odnose s javnošću-portparola (pojedinačno ili putem mailing liste), objavom saopštenja za javnost na službenoj web stranici Kantonalnog tužilaštva Unsko-sanskog kantona, usmenim izjavama za medije (snimane audio ili audiovizuelnim putem), te izuzetno saopštenjem usmenim putem.

Član 4.
(Način dostavljanja informacija portparolu)

(1) Stručnom saradniku za pristup informacijama i odnose s javnošću-portparolu će se informacije dostavljati u pravilu pisano i u elektronskoj formi (putem službene e-mail adrese), a izuzetno usmeno i telefonom.

(2) Stručnom saradniku za pristup informacijama i odnose s javnošću-portparolu će se dostavljati informacije o tužilačkim odlukama, sudskim odlukama u predmetima Kantonalnog tužilaštva Unsko-sanskog kantona, učešću tužilaca i drugog tužilačkog osoblja na seminarima i konferencijama, aktivnostima, posjetama i sastancima tužilaca i drugog tužilačkog osoblja, te drugim aktivnostima u radu Kantonalnog tužilaštva Unsko-sanskog kantona koje su od posebnog interesa za javnost.

Član 5.
(Rok za informisanje javnosti)

(1) Na pisane zahtjeve medija tražene informacije će se davati u razumnom roku, vodeći računa o interesu javnosti za konkretan slučaj.

(2) Na pisane zahtjeve za pristup informacijama koje u registru vodi Kantonalno tužilaštvo Unsko-sanskog kantona, odgovor će se davati u rokovima propisanim Zakonom o slobodi pristupa informacijama.

II NAČIN OBJAVLJIVANJA ODLUKA U FAZI ISTRAGE

Član 6.

(Način objavljivanja naredbe o provođenju istrage)

(1) Naredba o provođenju istrage se neće objavljivati, osim kada se utvrdi postojanje posebnog javnog interesa.

(2) Kada se utvrdi postojanje posebnog javnog interesa u ovoj fazi postupka, objavljeni podaci neće otkrivati identitet osumnjičenog lica.

(3) Informacija o provođenju istrage će obuhvatiti inicijale osumnjičenog lica, radnje koje su predmet istrage i pravnu kvalifikaciju djela.

(4) Izuzetno će se objaviti lični podaci osumnjičenog lica, ako su od ranije poznati javnosti ili na zahtjev samog osumnjičenog lica.

Član 7.

(Način objavljivanja naredbe da se neće provoditi istraga)

(1) Naredba da se istraga neće provoditi se neće objavljivati, osim kada se utvrdi postojanje posebnog javnog interesa.

(2) Kada se utvrdi postojanje posebnog javnog interesa u ovoj fazi postupka, objavljeni podaci neće otkrivati identitet prijavljenog lica.

(3) Informacija o naredbi da se istraga neće provoditi će obuhvatiti inicijale osumnjičenog lica, radnje koje su bile predmet prijave i pravnu kvalifikaciju djela ako je data.

(4) Izuzetno će se objaviti lični podaci prijavljenog lica, ako su od ranije poznati javnosti ili na zahtjev samog prijavljenog lica.

Član 8.

(Način objavljivanja naredbe o obustavi istrage)

(1) Naredba o obustavi istrage se neće objavljivati, osim kada se utvrdi postojanje posebnog javnog interesa ili kada je objavljena informacija o vođenju istrage.

(2) Kada se utvrdi postojanje posebnog javnog interesa u ovoj fazi postupka, objavljeni podaci neće otkrivati identitet osumnjičenog lica.

(3) Informacija o naredbi o obustavi istrage će obuhvatiti inicijale osumnjičenog lica, radnje koje su bile predmet istrage i pravnu kvalifikaciju djela.

(4) Izuzetno će se objaviti lični podaci osumnjičenog lica, ako su od ranije poznati javnosti, ako su ovi podaci prethodno objavljeni ili na zahtjev samog osumnjičenog lica.

Član 9.

(Način objavljivanja prijedloga za određivanje pritvora i prijedloga za izricanje mjera zabrane)

(1) Informacije o prijedlogu za određivanje pritvora i prijedlogu za izricanje mjera zabrane neće otkrivati identitet osumnjičenog lica, osim kada se utvrdi postojanje posebnog javnog interesa ili ako je identitet osumnjičenog lica od ranije poznat javnosti.

(2) Informacija o prijedlogu za određivanje pritvora i prijedlogu za izricanje mjera zabrane će obuhvatiti sud kojem je prijedlog podnesen, inicijale osumnjičenog lica, kvalifikaciju djela koje se osumnjičenom licu stavlja na teret i posebne razloge za pritvor.

Član 10.

(Način objavljivanja informacije o podignutoj optužnici)

(1) Informacija o podignutoj optužnici, prije potvrđivanja optužnice, se neće objavljivati, osim kada se utvrdi postojanje posebnog javnog interesa.

(2) Informacija o podignutoj optužnici, prije potvrđivanja optužnice, neće otkrivati identitet osumnjičenog lica, osim kada se utvrdi postojanje posebnog javnog interesa ili ako je identitet osumnjičenog lica od ranije poznat javnosti.

(3) Informacija o podignutoj optužnici, prije potvrđivanja optužnice, će obuhvatiti sud kojem je optužnica podnesena na potvrđivanje, inicijale osumnjičenog lica i kvalifikaciju djela koje se osumnjičenom licu stavlja na teret.

(4) Informacija o odluci suda da ne potvrdi optužnicu u cijelosti ili u pojedinim tačkama će se objaviti kada se utvrdi postojanje posebnog javnog interesa.

(5) Informacija o odluci suda da ne potvrdi optužnicu u cijelosti ili u pojedinim tačkama će obuhvatiti sud kojem je optužnica podnesena na potvrđivanje, inicijale osumnjičenog lica i kvalifikaciju djela koje se osumnjičenom licu stavljalo na teret.

III NAČIN OBJAVLJIVANJA ODLUKA NAKON POTVRĐIVANJA OPTUŽNICE

Član 11.

(Način objavljivanja informacije o potvrđenoj optužnici)

(1) Informacija o potvrđenoj optužnici objaviti će se kada se utvrdi postojanje posebnog javnog interesa, a naročito u predmetima:

(a) ratnih zločina i drugih krivičnih djela protiv međunarodnog prava koja ne zastarijevaju,

- (b) organiziranog kriminala,
- (c) koruptivnih krivičnih djela,
- (d) krivičnih djela protiv službene dužnosti,
- (e) privrednog kriminala,
- (f) krivičnih djela za koje se može izreći kazna dugotrajnog zatvora ili zatvora u trajanju od 10 godina.

(2) Informacija o potvrđenoj optužnici će obuhvatiti puno ime i prezime optuženog, godinu i mjesto rođenja optuženog, pune podatke o optuženoj pravnoj osobi, činjenični i pravni opis krivičnog djela, prijedlog za određivanje (produženje) pritvora, prijedlog za određivanje mjera osiguranja oduzimanja imovinske koristi, prijedlog za donošenje privremene mjere osiguranja imovinskopravnog zahtjeva i prijedlog za izricanje mjera sigurnosti.

(3) Informacija o potvrđenoj optužnici neće obuhvatiti imena svjedoka i oštećenih, prijedlog dokaza, rezultate istrage i dokaze koji potkrepljuju navode iz istrage.

Član 12.

(Način objavljivanja informacije o presudama)

(1) Informacija o prvostepenoj, drugostepenoj i trećestepenoj presudi suda u predmetima Kantonalnog tužilaštva Unsko-sanskog kantona objaviti će se kada se utvrdi postojanje posebnog javnog interesa, a naročito u predmetima:

- (a) ratnih zločina i drugih krivičnih djela protiv međunarodnog prava koja ne zastarijevaju,
- (b) organiziranog kriminala,
- (c) koruptivnih krivičnih djela,
- (d) krivičnih djela protiv službene dužnosti,
- (e) privrednog kriminala,
- (f) krivičnih djela za koje se može izreći kazna dugotrajnog zatvora ili zatvora u trajanju od 10 godina.

(2) Informacija o donesenoj presudi će obuhvatiti sud koji je donio presudu, puno ime i prezime optuženog odnosno osuđenog, godinu i mjesto rođenja optuženog odnosno osuđenog, pune podatke o optuženoj odnosno osuđenoj pravnoj osobi, činjenični i pravni opis krivičnog djela, odluku suda o krivici optuženog odnosno osuđenog, odluku suda o prijedlogu za određivanje (produženje) pritvora, odluku suda o prijedlogu za određivanje mjera osiguranja oduzimanja imovinske koristi, odluku suda o prijedlogu za donošenje privremene mjere osiguranja imovinskopravnog zahtjeva i odluku suda o prijedlogu za izricanje mjera sigurnosti.

(3) Informacija o žalbi na odluku suda u predmetima Kantonalnog tužilaštva Unsko-sanskog kantona objaviti će se kada se utvrdi postojanje posebnog javnog interesa.

(4) Informacija o žalbi na odluku suda u predmetima Kantonalnog tužilaštva Unsko-sanskog kantona obuhvatati će informaciju kada je podnesena žalba, na koju odluku i kojem sudu.

Član 13.

(Informiranje o presumpciji nevinosti)

Sve informacije o tužilačkim i sudskim odlukama u predmetima Kantonalnog tužilaštva Unsko-sanskog kantona koje se objavljuju do pravosnažnosti presude obuhvatati će napomenu o presumpciji nevinosti prijavljenog, osumnjičenog i optuženog lica.

Član 14.

(Vrijeme trajanje objave odluka na web stranici)

(1) Informacije o tužilačkim odlukama i sudskim odlukama koje prethode pravosnažnoj presudi, uklonit će se sa službene web stranice Kantonalnog tužilaštva Unsko-sanskog kantona nakon objave pravosnažne presude.

(2) Informacija o pravosnažnoj presudi ukloniti će se sa službene web stranice Kantonalnog tužilaštva Unsko-sanskog kantona nakon isteka roka od tri godina od dana objavljivanja presude, a najkasnije po isteku roka za brisanje osude.

(3) Informacije o tužilačkim odlukama i sudskim odlukama u predmetima ratnih zločina i drugih krivičnih djela protiv međunarodnog prava koja ne zastarijevaju, neće se uklanjati sa službene web stranice Kantonalnog tužilaštva Unsko-sanskog kantona.

IV NAČIN OBJAVLJIVANJA OSTALIH INFORMACIJA

Član 15.

(Način objavljivanja ostalih informacija)

Informacije o učešću tužilaca i drugog tužilačkog osoblja na seminarima i konferencijama, aktivnostima, posjetama i sastancima, tužilaca i drugog tužilačkog osoblja, te drugim aktivnostima u radu Kantonalnog tužilaštva Unsko-sanskog kantona objavit će se kada se utvrdi da su od posebnog interesa za javnost.

Član 16.

(Stupanje na snagu)

Ovo Uputstvo stupa na snagu danom odobrenja Kolegija tužilaca Kantonalnog tužilaštva Unsko-sanskog kantona i objavit će se na web stranici Kantonalnog tužilaštva Unsko-sanskog kantona.



GLAVNA KANTONALNA TUŽITELJICA

Fadila Amidžić